



Inatsisartuni ilaasortat  
Knud Kristiansen  
aamma  
Gerhardt Petersen  
ATASSUT

## **Nunatsinni qatserisartut annaassiniartartullu pillugit § 37 naapertorlugu apeqqutitut akissutit**

Asasakka Knud Kristiansen aamma Gerhardt Petersen

Kalaallit Nunaanni annaassiniartartut pillugit soqutiginninnissinnut pitsaasunillu siunertaqarnissinnut qujanarsuaq. Annaassiniarnissamut upalungaarsimaneq pingaartitorujussuuaara, Kalaallit Nunaata najugaqarfittut, suliffeqarfittut suliffinnillu ingerlatsivittut patajaatsuunissaanut, isumannaatsuunissaanut toqquissimanartuunissaanullu pingaaruteqarmat.

§ 37 naapertorlugu apeqqutitini Kalaallit Nunaanni innuttaasut inoqutigiillu amerlassusaannut naleqqiullugu ikiuiartortarnerit amerlanerat, aammalu ATASSUT-ip kisitsisinik eqqortumik tikkuussisunik Politiinut pissarsiniaraluarnerata iluatsissimannginnera tunngavilersuutigineqarput.

Aallarniutigalugu erseqqissaatigissavara, annaassiniarnissamut upalungaarsimasut piginnaanerinut tatiginnitorujussuugama. Ilisimatitsissutigissavara, qatserisartoqarfimmi pissutsinut akisussaaffiit kommuninit isumagineqarmata, aammalu politiit akisussaaffii danskinit susassarineqarmata.

Qatserisartut 2000-imiit 2005-imut orniguttarnerinut kisitsisitigut paasissutissat ersarissumik takutippaat, ornigunnerit amerlanersaat asuliinnaq ornigunnerusartut, ABA-mut atortut (ikuallattoornissamut kalerrisaarutit nammineq aallartartut) aserfallatsaaliorneqannginnertik pissutigalugu aallartarmata, tuliullugulu asuliinnaq kalerrisaarinerisunut orniguttoqartarluni. Orniguttarnerni pingajuattut inissittut tassaapput ikuallannerit annikinnerusut, nalinginnaasumik iganik eqqaavinnillu ikuallattoornermik peqquteqartartut.

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuineri iliuusissat pillugit Inatsisartut inatsisaat nr. 14, 26. maj 2010-meersoq 1. juli 2010-mi atuutilerpoq. Inatsit taanna malillugu kommunalbestyrelsi upalungaarsimanermut pisortamik, ilinniartitaanikkut immikkut ittunik piginnaaneqarnini tunngavigalugu annaassiniarnissamut upalungaarsimasunik ulluinnarni aqutsinermik isumaginnittussamik atorfinitsitsisussaavoq. Annaassiniarnissamut upalungaarsimasut ikuallattoornissamut, ajutoornernut ajunaarnersuarnullu

24-03-2014  
Sagsnr. 2014-097812  
Dok. Nr.1527124

Postboks 1614  
3900 Nuuk  
Tlf. (+299) 34 50 00  
Fax: (+299) 34 54 10  
E-mail: apn@nanoq.gl  
www.naalakkersuisut.gl

atatillugu inuit, pigisat avatangiisillu ajoqusernissaannut, kiisalu nunami akuutissanik ulorianartunik tassanngaannartumik ajutoornissamut isumannaatumik suliniuteqarsinnaasussaapput.

Kommunalbestyrelsi pisussaavoq, kommunimi upalungaarsimanermit pilersaarusiussalluni.

Tassami kommuni kommunimi pissutsinik pitsaanerusumik ilisimannittuovoq, taamaattumillu pissusiviusut tunngavigalugit annertunerusumik pilersaarusiorsinnaalluni. Tamanna pissutigalugu akisussaaffimmik Namminersorlutik Oqartussanut tunniussinissaq naleqqutissanngilaq.

Apeqqutit uku akineqarnissaannik ujartuivusi:

**1. Nunatsinni qatserisartut annaassiniartartullu Kommunit ataaniinneranni iluaqutaasut aamma/imaluunniit akornutaasut Naalakkersuisut naliliinerat tunngavigalugu suuppat?**

**Akissut**

Ajutoortoqartillugu ikiortissat qanittumiittussaapput. Kalaallit Nunaanni ikuallattoornissamut annaassiniarnissamullu upalungaarsimasut kommunit ataaniinnerat iluaqutissartaqarpoq, kommunit najukkani pissusiviusunik pitsaanerpaamik ilisimasaqartarmata. Ajornartoorfiusunik pisoqartillugu najukkani pissutsinik ilisimasaqarluarneq suliniuteqarnerup inerneranut pingaaruteqartuovoq.

Aamma kommunit illoqarfimmi suliffeqarfiit, innuttaasut, pilersuinerit il.il. ineriartornerinik ilisimasaqarluartuusarput.

Aamma annaassiniarnissamut upalungaarsimasuni sulisussarsiornermi kommuni isumalluutitut pisariaqartinneqartunut tappinnerusarpoq.

Kommuni suliassamik pisariaqartinneqartumik salliutitsiniarnani aalajangersimappat, imaluunniit kommuni taamatut tulleriarinngippat tamanna ajoqutissartaasinnaavoq.

**2. Naalakkersuisut piumassuseqarpat siunissami qatserisartut annaassiniartartullu aqqissugaanerisa allangortinneqarnissaannut, taamaalillutillu Kommunit ataaniikkunnaarlutik Namminersorlutik Oqartussat ataaniilernissaannut?**

**Akissut**

Kommunit politikerilluunniit allat peqataanngippata, oqartussaasuni sulianut, Namminersorlutik Oqartussanut tunniussinissamik siunertaqarfiusunut aalajangiussaqaarsinnaanngilanga.

**3. Iliuutsit suut Naalakkersuisut atorusuppaat nunatsinni inoqarfinni tamani, illoqarfinni nunaqarfinnilu, naammattunik**

## **qatserisartoqarlunilu annaassiniartartoqarnissaa qulakkeersimatinniarlugu?**

### **Akissut**

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaanni nr. 14-imi, 26. maj 2010-meersumi § 1 naapertorlugu kommunit annaassiniarnissamut upalungaarsimasunik, ajutoortoqarnerani ajunaarnersuaqarneranilu inuit, pigisat avatangiisillu ajoquserneqarnissaannut, tamatumunngaluunniit annertuumik ulorianartorsiornermut pinaveersaartitsineramik suliaqartussanik pilersitsisussaapput.

Inatsisip 2010-mi atuutilernerani kommunit inatsisip atuutilernergatigut aningaasartuutissat qaffaatissaannut taarsiiffigineqarput, taakkununngalu ilaatinneqarput ilaatigut upalungaarsimanermut pisortamik piffissaq tamakkerlugu atorfeqartussamik atorfinitsitsinissaq, annaassiniarnissamut upalungaarsimasuni sulisunik ilinniartitsinissaq, atortunik pisiniarnissaq, upalungaarsimanermut pilersaarusiornissaq il.il.

Taakku saniatigut ulorianartorsiorfiusinnaasut tunngavigalugit upalungaarsimasut annertussusilerneqartarnissaasa atuutsinneqalernissaa – tassalu inatsimmut allannguutissaq, 2014-imi upernaakkut ataatsimiinnermi suliarineqartussa qulassutitigissavara.

## **4. Naalakkersuisut piunassuseqarpat Nunatsinni qatserisartoqarfinni annaassiniartartoqarfinnilu sulisut tamarmik pitsaannerusunik sulinermi atugassarititaasut aammalu akissarsiarititaasut pitsanngorsaavigineqarnissaannut?**

### **Akissut**

Aningaasarsianut tunngasut ikuallannaveersaartitsineq qatserinerlu pillugit Inatsisartut peqqussutaat nr. 6, 30. oktober 1992-imeersoq naapertorlugu Kalaallit Nunaanni qatserisartunut akissarsiat aningaasarsiallu pillugit maleruagassani aalajangersarneqarput. Akissarsiat aningaasarsiallu akissarsianut qaffaasernerit, SIK-mut isumaqatigiissutigineqartut tunngavigalugit ingerlaavartumik iluarsiffigineqartarput. Akissarsiat amerlassusaannut qatserisartup sulinera aammalu angerlarsimasussaataaangeroq angerlarsimasussaataaanginnorsorluunniit apeqqutaapput. Akissarsiat qaammammut aalajangersimasumik tunniunneqartarput, aammalu sullissivinnut ikiunnermi qatserutinillu nakkutilliinermi siunnersortimut akissarsiatut tunniunneqartarlutik. Taakku saniatigut ornigunnernut sungiusarnernullu peqataanernut aningaasarsiaqartitsisoqartarpoq tapeqartitsisoqarsinnaallunilu.

Atorfeqarneq nammineq piumassutsimik atorfeqarneruvoq, aammalu suliffiup nalinginnaasup saniatigut isumagineqartussaalluni. Tassalu aningaasarsiat isertitaqarfittut pingaarnertut inissisimangillat. Taamaattumik aningaasarsiat nammineq piumassutsimik sulinermut immikkut ittumik akissarsiatut isigineqassapput.

23. juni 2012-imi SIK-mut isumaqatiginninniarnernut atatillugu angusat allattorsimaffianni imatut isumaqatigiissuteqartoqarpoq:

”Illuatungeriit isumaqatigiinniarnermi qatserisartut SIK-mut isumaqatigiissutip ataani piffissap ilaani/nammineq piumassutsimik sulineq pillugu apeqquq oqaloqatigiissutigaa. Piffissami isumaqatigiissuteqarfiusumi piaartumik suliassaqaarfimmuq isumaqatigiissusiortoqassasoq illuatungeriit isumaqatigiissutigaa.”

SIK-mut isumaqatiginninniarnernut 2014-imi ukiup affaata siulliup ingerlanerani aallarnisarneqarnissaa naatsorsuutigineqarpoq.

**5. Naalackersuisut piumassuseqarpat qulakkeerniassallugu nunatsinni qatserisartut annaassiniartartullu ilinniartitaanikkut aammalu ilinniaqqinnissatigut periarfissaasa aningaasanut inatsit aqputigalugu pitsanngorsaavigineqarnissaannut?**

**Akissut**

Aningaasanut inatsit aqputigalugu upalungaarsimanermit ilinniartitaanermit, Kalaallit Nunaanni Qatserinermik Ilinniarfimmik isumagineqartumut aningaasanik nuussisoqarpoq. Ilinniartitaaneq immikkoortunut aggugaavoq, taamaalillunilu upalungaarsimasut illoqarfimmi, nunaqarfimmi kommunimiluunniit pisariaqartitsineq, imaluunniit soqutigisat piginnaanerillu ataasiakkaat apeqquataatillugit ilinniarneq ingerlanneqarsinnaavoq.

Tassalu ilinniartitaanernut aningaasanik nuussisoqartareerpoq.

**6. Nunatsinni qatserisartoqarneq annaassiniartartoqarnerlu pillugit Naalackersuisut immikkut allanik taasaqarusuppat?**

**Akissut**

Kalaallit Nunaanni upalungaarsimanerup ineriartortinneqartuarnissaa Naalackersuisut kissaatigaat. Taamaattumik ulorianartorsiorfiusut tunngavigalugit annertussusiliisarnernup atuutilernissaanut siunnersuutip, 2014-imi upernaakkut ataatsimiinnermi Inatsisartunut saqqummiunneqartussap aalajangiiffigineqarnissaanut qilanaarpunga. Siunnersuutip kingunerisaanik upalungaarsimasut annertussusilerneqarnissaannut piginnaatitaaffik Naalackersuisuniit kommunalbestyrelsinut nuunneqassaaq. Ulorianartorsiorfiusinnaasut tunngavigalugit annertussusiliisarnermi annaassiniarnissamut upalungaarsimasut kommunimi pissusiviusut malillugit, aammalu

kiffartuussinerup qaffasissusia, kommunalbestyrelsip innuttaasunut neqeroortigineqartussatut kissaatigisaa aallaavigalugit annertussusiliisoqartassaaq.

Aammattaaq oqaatigissavara, nammineq piumassutsimik suliaqarnerup eqqumaffigineqarnera annertusineqarsimammat. Maannakkorpiaq suleqatigiit, namminneq piumassusertik tunngavigalugu sulisut suliaq aaqqissuullugu ingerlappaat. Nammineq piumassutsimik tunngaveqarluni sulinerup soqutigineqarnera annertusissasoq, taamaalillunilu aamma upalungaarsimanermut malunniuteqarnissaa eqqoriarsinnaavara. Tamanna peqqissutsimut takussutissatut isigaara, tikilluaqqaralu.

Inussiarnersumik inuulluaqqusillunga

Kim Kielsen